

## I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

### OGASUN, FINANTZA ETA AURREKONTU SAILA

**Foru Gobernu Kontseiluaren 6/2022 Zerga premiazko araugintzako dekretua, apirilaren 12koa. Ones-  
tea alda daitezela zerbitzu digital jakinen gaineko zerga eta finantza transakzioen gaineko zerga**

Xedapen honen xedea da aldatzea zenbait zerbitzu digitalen gaineko zerga arautzen duen martxoaren 15eko 3/2022 Zerga Premiazko Araugintzako Dekretua eta finantza transakzioen gaineko zerga arautzen duen martxoaren 15eko 4/2022 Zerga Premiazko Araugintzako Dekretua, bi zerga horiek ikuskatzeko eskumena lurralde historikoen artean banatzeko arauak eranstea.

Xedapen hau presaz onetsi beharra justifikatuta dago; izan ere, Arabako Foru Aldundiak onetsi du jada zerga horien araudia, eta beharrezkoa da erantsi beharreko arau horiek izatea zergak ikuskatzeko lanak egin ahal izateko.

Aztertu da Zerga Araudiaren Zerbitzuak horri buruz egindako arau inaktuaren txosten laburra.

Horren ondorioz, lehenengo diputatu nagusiorde eta Ogasun, Finantza eta Aurrekontu Sai-  
leko foru diputatuaren proposamenez, Foru Gobernu Kontseiluak gaur bertan egindako bilkuran  
gaia aztertu ondoren, eta Arabako Zergei buruzko otsailaren 28ko 6/2005 Foru Arau Orokorraren  
8. artikulua eta Arabako Foru Aldundiaren antolaketari, funtzionamenduari eta araubideari  
buruzko abenduaren 18ko 52/1992 Foru Arauak Foru Aldundiari ematen dizkioten eskumenak  
erabiliz, presazko arrazoiak direla eta, honako hau:

#### XEDATZEN DUT

##### **1. artikulua. Zenbait zerbitzu digitalen gaineko zerga**

Aldaketa batzuk egiten dira zenbait zerbitzu digitalen gaineko zerga arautzen duen mar-  
txoaren 15eko 3/2022 Zerga Premiazko Dekretu Arauemailean. Hona hemen:

Bat. Aldatu egiten da 3. artikulua izenburua, eta 3. apartatua eransten zaio artikulua horri.  
Honela gelditzen dira idatzita:

##### **“3. artikulua. Zergaren ordainarazpena eta ikuskapena”**

“3. Arabako Foru Aldundiaren organoei dagokie zerga ikuskatzea, baldin eta zergadunaren  
zerga egoitza Arabako Lurralde Historikoan badago, eragindako gainerako zerga administra-  
zioen elkarlana baztertu gabe, eta ondorioak izango ditu administrazio eskudun guztien aurrean,  
haiei dagokien zerga proportzioa barne.

Ikuskapen jarduketa horien ondorioz hainbat administrazioi zorren bat ordaindu edo  
kopururen bat itzularazi behar zaiela jakiten bada, Arabako zerga administrazioak kobratu edo  
ordainduko du zor edo itzultze hori, eta administrazioek gero emango dizkiote konpentsazioak  
elkarri, beharrezkoa bada.

Arabako Foru Aldundiaren organo ikuskatzaileek beren jarduketan emaitzen berri emango  
diete eragindako gainerako administrazioei.

Arabako Foru Aldundiak egiaztapenetan ezarritako proportzioak ondorioak ekarriko ditu  
zergadunarentzat, likidatutako betebeharrak dagokienez, baina horrek ez du galarazten egiaz-  
tapen horien ondoren administrazio eskudunen artean behin betiko beste proportzio batzuk  
erabakitzea”

Bi. 4. artikuluan, 13 apartatua gehitzen da, eta honela geratzen da idatzita:

“13. Zergaren aplikazio lurraldea: Espainiako lurraldea”

Hiru. 13. artikuluko 1. apartatuko g) letra aldatzen da, eta honela geratzen da idatzita:

“g) Zerga administrazioak zergadunaren zerga egoera kontrolatzeko hala eskatzen duenean, euskarara edo gaztelaniara itzultzea zerbitzu digitalei dagozkien fakturak, kontratuak edo egiaztagiria, baldin eta zerbitzuok zergaren aplikazio lurraldean emandakotzat jotzen badira”

Lau. Aldatu egiten da azken xedapenetako lehena, eta honela geratzen da idatzita:

“Lehenengoa. Indarrean jartzea.

Xedapen orokor hau ALHAOn argitaratu eta hurrengo egunean jarriko da indarrean, eta 2021eko urtarrilaren 16tik aurrera sortuko ditu ondorioak, hargatik eragotzi gabe ekonomia itunaren hamargarren xedapen iragankorrean ezarritakoa”

## **2. artikulua. Finantza transakzioen gaineko zerga**

Aldaketa batzuk egiten dira finantza transakzioen gaineko zerga arautzen duen martxoaren 15eko 4/2022 Zerga Premiazko Dekretu Arauemailean. Hona hemen:

Bat. Aldatu egiten dira 3. artikulua izenburua eta 2. apartatua, eta 3. apartatua eransten zaio artikulua horri. Honela gelditzen dira idatzita:

### **“3. artikulua. Zergaren ordainarazpena eta ikuskapena”**

“2. Likidazioaldi bakoitzean Araban egindako eragiketen bolumenaren proportzioa honako ehuneko honen arabera izango da: egoitza soziala Araban duten sozietateen akzioei dagozkien eragiketen zerga oinarriaren ehuneko subjektu pasiboaren guztiko zerga oinarrian. Ehuneko hori bi dezimaletan biribilduko da”

“3. Arabako Foru Aldundiaren organoei dagokie zerga ikuskatzea, baldin eta subjektu pasiboaren zerga egoitza Arabako Lurralde Historikoan badago, eragindako gainerako zerga administrazioen elkarlana baztertu gabe, eta ondorioak izango ditu administrazio eskudun guztien aurrean, haiei dagokien zerga proportzioa barne.

Ikuskapen jarduketa horien ondorioz hainbat administrazioi zorren bat ordaindu edo kopururen bat itzularazi behar zaiela jakiten bada, Arabako zerga administrazioak kobratu edo ordainduko du zor edo itzultze hori, eta administrazioek gero emango dizkiote konpentsazioak elkarri, beharrezkoa bada.

Arabako Foru Aldundiaren organo ikuskatzaileek beren jarduketan emaitzen berri emango diete eragindako gainerako administrazioei.

Haren egiaztapenetan ezarritako proportzioak ondorioak ekarriko ditu zergadunarentzat, likidatutako betebeharrak dagoenez, baina horrek ez du galarazten egiaztapen horien ondoren administrazio eskudunen artean behin betiko beste proportzio batzuk erabakitzea”

Bi. Aldatu egiten da azken xedapenetako lehena, eta honela geratzen da idatzita:

“Lehenengoa. Indarrean jartzea.

Xedapen orokor hau ALHAOn argitaratu eta hurrengo egunean jarriko da indarrean, eta 2021eko urtarrilaren 16tik aurrera sortuko ditu ondorioak, hargatik eragotzi gabe ekonomia itunaren hamargarren xedapen iragankorrean ezarritakoa”

## **AZKEN XEDAPENAK**

Lehenengoa. Indarrean jartzea.

Xedapen orokor hau ALHAOn argitaratu eta hurrengo egunean jarriko da indarrean, eta 2021eko urtarrilaren 16tik aurrera sortuko ditu ondorioak.

Bigarrena. Gaitzea.

Baimena ematen zaio Arabako Foru Aldundiari xedapen orokor hau garatzeko eta aplikatzeko behar diren xedapen guztiak emateko.

Hirugarrena. Batzar Nagusietara bidaltzea.

Zerga premiazko araugintzako dekretu hau Arabako Batzar Nagusietara bidaliko da, indarrean dagoen arautegian ezarritakoarekin bat etorritz baliozkotu edo baliogabetu dezaten.

Vitoria-Gasteiz, 2022ko apirilaren 12a

*Diputatu nagusia*

**RAMIRO GONZÁLEZ VICENTE**

*Lehenengo diputatu nagusiorde eta Ogasun, Finantza eta Aurrekontu Saileko foru diputatua*

**ITZIAR GONZALO DE ZUAZO**

*Ogasun zuzendaria*

**MARÍA JOSÉ PEREA URTEAGA**